

TIL - MILLAT HAMIYATI

Nasiba Boshmonova

Jizzax viloyati

Hamid Olimjon va Zulfiya nomidagi

ijod maktabining 9-sinf o'quvchisi

Annotatsiya

Til-millatning ruhidir.

Kalit so'zlar:

Buyuk adiblar, ijod maktablari, B.M.T.

Аннотация

Язык - это душа нации.

Ключевые слова:

Великие писатели, творческие школы, Б.М.Т.

Annotation

Language is the soul of a nation.

Keywords:

Great writers, creative schools, B.M.T

O'zbek tili... Ikki so'zdan iborat bo'lgan bu jumla mening hayotimga, mening yuragimga, mening jon-tanimga tog'lardek yuksak g'ururni, nurli kelajakni, shonli tarixni, o'zligimni, o'zbekligimni olib kirgan mo'jizaviy, ilohiy tilsimdir. Bu til men uchun shunchaki bir oddiy til emas, tanamga, ruhiyatimga ona suti orqali singib ketgan ona tilim, onajonim tili! U ilk bor tilimdan "Vatan" so'zini o'zgacha his bilan aytgan onim, ilk bor maktab tomon bosgan qadamim, ilk bor g'oliblik tuyg'usini his qilgan chog'imda faxr va iftixordan beixtiyor ko'zimdan tomchilagan quvonch ko'zyoshlari, ilk bor yutug'imni otam va onamga maqtanish uchun hayajonga to'lib so'zlagan onimda dilimda paydo bo'lgan g'ururim, u mening hayotim, u mening borlig'im, men o'zbek tilisiz o'zimni tasavvur ham qila olmayman, axir, u mening o'zligim. Ona tilim menga o'zbekligimni anglatadi, o'zinga bekligimni anglatadi. Men ona tilim uchun jonimni ham berishga tayyorman, nafaqat men, balki, butun O'zbekiston ahli jonini berishga tayyor, jonimizni berishga tayyormiz, xuddi bobolarimiz kabi!

Bobolarimiz o'zbek tili uchun, o'zbekning ozod xalq bo'lishi uchun jonini fido qilishdan qo'rqmadilar, aksincha, ular buni o'zlari uchun sharaf deb bildilar. Bunday buyuk insonlar qatoriga Abdulla Avloniy, Abdulla Qodiriy, Cho'lpon kabi buyuklikda tengi yo'q daholarni kiritishimiz va bu qatorni uzoooq davom ettirishimiz mumkin. Bobolarimiz oltin-u zarlardan ming chandon ustunroq bo'lgan o'zbek tilini bizga meros qoldirishgan. O'zbekiston Respublikasining Birinchi Prezidenti Islom Karimov ona tilimizga shunday ta'rif bergan edi: " O'zlikni anglash, milliy ong va tafakkurning ifodasi, avlodlar o'rtasidagi ruhiy-ma'naviy bog'liqlik til orqali namoyon bo'ladi. Jamiyki ezgu fazilatlar inson qalbiga, avvalo, ona allasi, ona tilining betakror jozibasi bilan singadi. Ona tili-bu millatning ruhidir". O'zbek tili biz o'zbeklar uchun buyuklar qoldirgan buyuk omonatdir. Shuning uchun ham biz o'zbek tilini asrab-avaylashimiz, o'zbek tiliga boshqa tillardagi so'zlarni aralashtirib behurmatlik qilmasligimiz, uni

sevishimiz darkor. Shundagina o'zbek tili bugungi kunda erishgan zafarlaridan-da yuksak zafarlarga erishadi.

Lekin, o'zbek tilining bugungi kunga qadar erishgan yutuqlari har bir o'zbekka o'zgacha faxr va iftixor bag'ishlaydi. Chunki, O'zbekistonda yoshlarning ona tilimizga bo'lgan mehr-muhabbatini, e'tiborini oshirish maqsadida turli islohotlar olib borilmoqda. Misol tariqasida Toshkentda Alisher Navoiy nomidagi Toshkent davlat o'zbek tili va adabiyoti universitetining qad ko'targanini, viloyatlarda ona tili va adabiyot fanlarini chuqurlashtirib o'qitishga ixtisoslashtirilgan maktablar o'z faoliyatini olib borayotganini aytishimiz mumkin. Nafaqat ona tilimizga, balki, uni qadrlagan shoir va shoiralarga, adib va adibalarga ham o'ziga xos e'tibor qaratilmoqda, ya'ni buyuk ijodkorlarning tug'ilgan viloyatlarida ularning nomi bilan ataladigan ijod maktablari Hamid Olimjondek, Is'hoqxon Ibratdek bo'lajak shoirlarni, Zulfiyaxonimdek, Halima Xudoyberdiyevadek yosh shoiralarni ulg'aytirmoqda. Adiblar xiyobonining barpo etilishi ham buyuk ijodkorlarga bo'lgan e'tiborning yana bir dalilidir. O'zbek tilining erishgan yutuqlarini davom ettiradigan bo'lsak, O'zbekiston Respublikasi Prezidenti Shavkat Mirziyoyevning B.M.T. Bosh Assambleyasining 75-sessiyasida ilk bor o'zbek tilida nutq so'zlaganini misol qilib keltirish har birimiz uchun faxrli ekanligini his qilamiz. Xullas, O'zbekiston o'zbek tilining qator yutuqlariga erishib kelmoqda va bu yutuqlar albatta bardavom bo'lishiga ishonamiz!

Ona tilim, ko'nglim bulbulidirsan,
Senda bordir shonli tarix sururi.
Yuragimdan unib chiqqan guldirsan,
Sensan bu xalqimning yuksak g'ururi.

Ruhimsan, ilohiy, sirli qo'rg'onim,
Millatning, milliylik qadri, ruhisan.
Sen borliging sabab urar bu jonim,
Sen borliging sabab yashaydi bu tan.

Jannat yurtda jannatiylik tilisan,
Qalbimga solgansan mavjli tug'yonni.
O'zbekiston yuragisan, dilisan,
Sensan mening hayotimning hoqoni.

Iftixor bog'isan, faxr bog'isan,
Bog'boningdir o'zbek, gulingdir o'zbek.
Cho'lpon, Qodiriyning so'nmas ohisan,
Ona tilim til ko'rmadim seningdek.

Navoiyning qalamiga siyohsan,
Qog'ozsan Boburning g'azal, satriga.
Avloniy dardidan mutloq ogohsan,
Lolasan Muhammad Yusuf qabriga.

To'marisdan qolgan orsan, nomussan,
Temur qilichiga bitilgan bitik.
Yurtboshim yo'lida nursan, fonussan,
Manguberdidirsan qaddi tik, tetik.

Islom Karimovning da'vat so'zisan
O'zbekni zafarga tinmay chorlagan.
Erkinliksan, hurriyatning o'zisan,
Kelajaksan nurli, baxtdan porlagan.

Tomirdagi qonim uzra sizasan,
Vatan tuyg'usini qilib unga jo.
Ozodlik, xurlikni qalbdan sezaman,
Shunday baxtni loyiq ko'ribdi Xudo.

Ona tilim, ko'nglim bulbulidirsan,
Sensan bu xalqimning yuksak g'ururi!!!

Foydalanilgan adabiyotlar:

1. "Bunda bulbul kitob o'qiydi" nomli ijodkorlar bayozi